

समै – 12:25 hrs.

<><><><><><>

#### LG-Smvidhan

उपराज्यपाल मनोज सिन्हा होरें 25 जून 1975 गी लाई गेदी इमरजेंसी गी संविधान दी हत्या दस्सेआ। संविधान हत्या दिवस सरबंधी स्नेह च एल.जी होरें आपातकाल खिलाफ लोतंत्र दी परतिए बहाली लेई उस्सलै खड़ोते दे सत्यग्रहिं गी नमन कीता। सत्यग्रही भारतीय इतिहास दे उस काले दौर च खड़ोते हे ते संवैधानिक मूल्लें गी बनाई रखने लेई लड़ाई लड़ी। एल.जी होरें उंदी दलेरी ते संविधान दी आत्मा गी बनाई रखने प्रति बचनबद्धता ते लोकतांत्रिक विचारें गी बनाई रखने लेई निभाई गेदी भूमिका गी चेता कीता।

<><><><><><>

#### CM-Statehood

मुख्यमंत्री उमर अब्दुल्ला होरें आखेआ ऐ जेकर जम्मू-कश्मीर गी परतियै राज्य दा दर्जा दिता जंदा ऐ तां अस नमैं सिरेआ चुनां करने दे विचार दा समर्थन करने आं। गुलमर्ग च मीडिया आहलें दे सवालें दा परता दिंदे होई उनें आखेआ जे राज्य दा दर्जा स्थाढ़ा हक ऐ, कोई विशेषाधिकार नेई। मुख्यमंत्री होरें गलाया जे राज्य दा दर्जा बहाल करने दी मंग मते चिरें थमां होआ करदी ऐ ते एहदी कदर कीती जानी चाइदी ऐ।

<><><><><><>

#### Dy CM Industry

उपमुख्यमंत्री सुरिंदर चौधरी होरें आखेआ ऐ जे सरकार जम्मू-कश्मीर दी अर्थ बवस्था गी मजबूत करने ते रोजगार पैदा करने लेई परानी औद्योगिक इकाइयें गी परतियै बहाल करने ते नमीं इकाइयें गी बढ़ावा देने लेई प्रतिबद्ध ऐ। श्रीनगर च फेडरेशन ऑफ चैंबर ऑफ इंडस्ट्रीज कश्मीर कन्नै इक बैठक दी अध्यक्षता करदे होई लोड़चदे फायदें गी फौरन जारी कीते जाने दा भरोसा दोआया। इस दरान उद्योग जगत दे नुमाइंदें लीज़ डीड नियमितिकरण, खराब बुनियादी ढांचे ते माली रूकावटें जनेही गल्लें बारै उनेंगी दस्सेआ।

डी.सी. होरें अधिकारियें गी औद्योगिक इलाकें दा दौरा लाने ते उनेंगी आवारदी परेशानियें दा समाधान करने दे निर्देश दिते ते मकामी उद्योग ते निवेश गी बढ़ावा देने लेई हर चाल्ली दा समर्थन देने दी फी तस्दीक कीती।

<><><><><><>

#### PMAY-G Poonch

प्रधानमंत्री आवास योजना ग्रामीण तैहत जिला पुंछ नै 97 फीसद कम्म सबूरे कीते न। इयां करिए पुंछ नै इक महत्वै आहली उपलब्धि हासल कीती ऐ। जम्मू खिते च एह दर हासिल करिए पुंछ जिले नै पैहली थाहर हासल कीती ऐ। डिप्टी कमिशनर विकास कुंडल हुंदी निगरानी च लागू कीती जा रदी एह पहलकदमी ग्राएं च सारें लेई आवास यकीनी बनाने लेई प्रशासन दी प्रतिबद्धता गी दर्शादी ऐ। मंजूर कीते गेदे 49 जहार 265 घरें चा अजें तोड़ी कुल 47 जहार 784 घरें गी सफलतापूर्वक पूरा कीता गेआ ऐ।

<><><><><><>

#### Budha-Amarnath

पुंछ दे डिप्टी कमिशनर विकास कुण्डल होरें 27 जुलाई 2025 थवां शुरू होने आहली सालाना श्री बुड्डा अमरनाथ जी दी यात्रा दी तैयारिएं दा जायजा लैता। इस मौके पर एडीसी होर बी उन्दे कन्नै मौजूद हे। सरबन्धी मैहकमें गी हिदायत कीती गेई ऐ जे ओह श्रद्धालुएं लेई रौहने आहली थाहरें, साफ-सफाई, मेडिकल स्हूलत, पानी ते बिजली दी सप्लाई, यातायात बगैरा यकीनी बनान। डिप्टी कमिशनर होरें भरोसा दोआया जे प्रशासन सारे श्रद्धालुएं दी सुरक्षित ते रमानदारी आहली यात्रा यकीनी बनाने लेई बचनबद्ध ऐ।

<><><><><><>

#### PM-MKB

प्रधानमंत्री नरेंद्र मोदी होर इस म्हीने दी 29 तरीक गी आकाशवाणी पर प्रसारित होने आहले अपने माहवार रेडियो कार्यक्रम “मन की बात” राएं देश-विदेश दे लोकें कन्नै अपने विचार सांझे करडन। एह इस कार्यक्रम दी 123मीं किश्त होग। लोक इस कार्यक्रम लेई अपने विचार ते सुझा टोल फ्री नंबर 1800-11-7800 पर सांझे करी सकदे न। लोक अपने विचार ते सुझा

नरेंद्र मोदी ऐप या फी My Gov open forum पर भेजी सकदे न। विचार सांझा करने ते सुझा भेजने दी खीरी तरीक 27 जून ऐ।

<><><><><><>

## Programme Announcement

आकाशवाणी जम्मू दे क्षेत्रीय समाचार एकांश आसेआ 26 जून गी दपैहरी 12 बजे नशीले पदार्थे दी रोकथाम सरबंधी अंतरराष्ट्री ध्याड़े दे सरबंधै च 25 मिनटें दी विशेष परिचर्चा प्रसारित कीती जागं इस कार्यक्रम च स्हाड़े परौहने होडन एस.एस.पी एंटी नार्कोटिक्स टास्क फोर्स मोहम्मद अनवर उल हक ते जम्मू यूनिवर्सिटी दे मनोविज्ञान डिपार्टमेंट दियां साबका प्रमुख आरती बखशी। इस परिचर्चा च इनें परौहनें कन्नै गल्लबात करडन स्हाड़े एंकर जगमोहन शर्मा। तुस इस कार्यक्रम गी स्हाड़े इस्सै चैनल पर बी सुनी सकदे ओ। आकाशवाणी समाचार ते समाचार एकांश आसेआ प्रस्तुत कीते जाने आहले कार्यक्रमें गी तुस 303 मीटर यानि 990 किलोहर्टज ते एफ.एम 100.3 पर सुनी सकदे ओ।

<><><><><><>

## Weather

जम्मू-कश्मीर च होई दी बरखा करी लोकें गी उमस आहले मौसम थमां राहत थहोई ऐ ते लोकें थोड़ी राहत मसूस कीती ऐ। मौसम विभाग नै जम्मू खिते च अज्जै थवां 27 जून तगर किश थाहरें पर भारी बरखा होने दी पेशगाई कीती ऐ। लोकें गी सलाह दिती गेई ऐ जे हाड़ें दे खदशे आहली थाहरें थवां दूर रौहन। पहाड़ी इलाकें च ल्हास-पस्सियां बी पेई सकदियां न। हेठले मैदानी इलाकें च पानी किट्ठा होने दी समस्या होई सकदी ऐ। प्रशासन नै करसानें गी सलाह दिती ऐ जे ओह सिंचाई आहले कम्मै गी फिलहाल रोकी देन तां जे नुकसान थवां बचेआ जाई सकै। लोकें गी सौहगा ते सतर्क रौहने ते सुरक्षा सरबंधी हिदायतें दी पालमा करने दी सलाह दिती गेई ऐ।

<><><><><><>